

## 每週經課朗誦經文(巴克禮台語漢字)2012/10/07

### 共同經課 - 1

#### 約伯記一章一節、二章一節~十節

1 烏斯的地曾有一人名叫約伯；彼人完全閣正直，敬畏上帝，離開諸個歹。1 閣有一日，上帝許個子來家已倚佇耶和華的面前，撒但也來佇 in 中間，家已倚佇耶和華的面前。2 耶和華對撒但講：「你對叨落來？」撒但應耶和華講：「我佇地上行來行去，遍行佇遐，對遐來。」3 耶和華對撒但講：「你有留心佇我的奴僕約伯嗎？因為地上無人親像伊完全閣正直，敬畏上帝，離開諸個歹。你雖然激我攻擊伊，無因端毀壞伊，伊猶原執守伊的純全。」4 撒但應耶和華講：「用皮換皮，人為著伊的生命，願了伊一切所有的。」5 總是你伸你的手磕著伊的骨及伊的肉，就伊欲當面棄絕你。」6 耶和華對撒但講：「看啊，伊佇你的手頭，獨獨著留伊的生命。」7 撒但就對耶和華的面前出去，拍約伯，互伊對腳底到頭殼頂生毒瘡。8 伊就用瓦片坯來扒身軀，坐佇火灰中。9 伊的某就對伊講：「你猶久執守你的純全嗎？著棄絕上帝，來死！」10 若是約伯對伊講：「你講話是親像許個躉的婦仁人所啲講的。怎樣呢！咱對上帝受福氣，豈無對伊受災禍嗎？」佇這一切的事約伯並無對伊的嘴來犯罪。

### 共同經課 - 2

#### 詩篇二十五篇、二十六篇

1 [大衛的詩] 耶和華啊，我的心神仰望你。2 我的上帝啊，我平素倚靠你；毋通互我見誚，毋通互我的對敵因為贏我來誇口。3 見若聽候你者的確無見誚；許個無緣故行奸詐者欲見誚。4 耶和華啊，求你將你的道路指示我，將你的路途教我！5 求你導我佇你的真理，閣教我，因為你是救我的上帝。我通日聽候你。6 耶和華啊，求你記念你的憐憫及你的慈愛，因為這是古早以來常常有的。7 求你毋通記念我少年的罪過及我的過失；耶和華啊，求你照你的慈愛，因為你的恩惠記念我，8 耶和華是好閣正直，所以伊欲指示罪人行正路。9 伊欲用公平引導謙遜的人，伊欲用伊的道路教示謙遜的人。10 見若守伊的約及伊的干證的人，耶和華款待 in 攏是用慈愛誠實。11 耶和華啊，我的罪真重，求你因為你的名赦免我。12 甚麼人敬畏耶和華，耶和華欲指示伊所著揀的路。13 伊的心神欲得著安息；伊的後裔欲承接土地。14 耶和華及敬畏伊的人親密；閣欲將伊的約指示 in。15 我的目調常常向耶和華，因為伊欲互我的腳脫離羅網。16 求你越轉向我，可憐我，因為我是孤單閣困苦。17 我的心內的憂苦真多，求你救我脫離佇我攏總的患難。18 求你看我的艱難，及我的勞苦，赦免我一切的罪。19 求你看我的對敵，因為 in 真多，in 怨恨我真惡毒。20 求你保護我的生命，拯救我，互我無見誚，因為我倚靠你。21 願純全、正直保護我，因為我聽候你。22 上帝啊，求你救贖以色列脫離伊一切的艱苦。1 [大衛的詩] 耶和華啊，求你給我判斷，因為我有照我的純全來行；我倚靠耶和華，無搖拙。2 耶和華啊，求你監察我，試驗我，鍛煉我的心腸。3 因為你的慈愛常常佇我的目調前，我亦有照你的真理行。4 我未曾及謊誑的人相及坐，亦無及假做的人做陣。5 我怨恨歹人的會，無欲及惡毒的人同坐。6 耶和華啊，我欲洗手表明我的無罪，才來惹你的祭壇；7 通互人聽見感謝的聲，閣通講起你一切奇妙的所做。8 耶和華啊，我疼惜你所住的厝以及你榮光所佇的所在。9 毋通將我的靈魂及罪人做一下收拾去；毋通將我的活命及剖人者做一下收拾去。10 in 的手中有奸惡，in 的正手滿滿賄賂。11 論到我，我欲照我的純全來行；求你救贖我，憐憫我！12 我的腳倚佇平坦的所在，佇眾會中我欲謳嘍耶和華！

### 共同經課 - 3

#### 希伯來書一章一節~四節、二章五節~十二節

1 願咱的主耶穌基督的恩典及恁的神相及佇啲。阿們！2 上帝佇在早已經託許個先知用多多段、多多方法給列祖講，3 今佇許個日的路尾託伊的子給咱講；就是伊所設立做承接萬物的後嗣，亦曾對伊來創造諸個世界。4 伊是上帝的榮耀所發出的光，是上帝本質的真像，伊用伊權能的話啲扶載萬物。已經成清潔罪的事，就坐佇極高的天頂大威嚴者的大旁。5 閣上帝用諸個神蹟、奇事、逐項的權能，及聖神的賞賜，攏照家己的旨意，及 in 相及干證。6 因為阮所講啲來的世界，上帝未曾互伊降服佇天使。7 獨獨有干證佇某所在的講：人是甚麼，互你數念伊？人的子是甚麼，互你看顧伊？8 你互伊略仔卡輸天使，閣用榮光尊貴，互伊做冕旒，閣設立伊佇你的手所造者的頂面，9 互萬物攏降服佇伊的腳下。已經互萬物攏降服伊，就無剩一項物無降服伊。總是到今咱猶未看見萬物攏降服伊。10 獨獨看見彼個略仔卡輸天使的耶穌；為著受死的艱苦，得著榮光尊貴做冕旒，通對上帝的恩，為著眾人受死。11 因為萬物所為著伊、萬物所對伊的，啲導多多子到佇榮光，就互救 in 的首領，對苦難來成完全，本是合宜。12 因為彼個互人成聖的及許個得著成聖的，攏對一個出。所以伊稱 in 做兄弟無掠做見誚，

### 共同經課 - 4

#### 馬可福音十章二節~十六節

2 有法利賽人就近伊問講：「人離出伊的某通嗎？」是啲試伊。3 耶穌應講：「摩西命令恁怎樣？」4 in 講：「摩西准人寫離書來離伊。」5 若是耶穌給 in 講：「摩西因為恁的心硬，才寫此個命令互恁；6 總是對造化的起頭，主創造 in 有男有女。7 因為按呢，人欲離開父母，結聯伊的某，二個欲成做一體。8 親像按呢，無做二個，是做一體。9 所以，上帝所配合的，人毋通分開伊。」10 入厝，學生閣將此個代誌問伊。11 伊給 in 講：「凡若離出伊的某來娶別個的，是行姦淫，來辜負伊；12 某若棄揀伊的丈夫來嫁別個，也是行姦淫。」13 有人帶細子就近耶穌，欲互伊摸 in，學生責備 in。14 耶穌看見按呢大無歡喜，給學生講：「容允細子就近我，莫得禁 in；因為上帝的國，是此號人的。15 我實在給恁講，凡若承接上帝的國，無親像細子的，決斷袂得入去。」16 就抱 in，給 in 接手，祝福 in。